

洞玄靈寶五感文

靈書肘後鈔

卷六

且三元得五數是一將主也三將各得五數
三五一十五也上攝五方中通五藏下領五
獄又上通三天中鎮三魂下攝三官又上佐
三尊中治三門下截三賊又上領三丁丁天丁

神中發五星下攝百靈又上截五魔中治五

精五精依土木等日下為災崇夜見光下却五

兵謂之三五璇璣玉衡之要訣也行之三千

日白日上昇若或治疾先存思唐將軍左腎

出初如半寸長至眉間光華之地草長一寸

離光華在身左便長八尺一寸若在山草衝

路江海之處便長八十一丈左手執節腰劔

帶符其身左衛護有克惡鬼神悉皆攝殺今

散葛將軍右腎出周將軍心中出若謁帝王

先存出隨行無事不得妄行若軍陣之中計

不相敵恐被殺者即思三將軍名字以思斗

蓋身他人不見若為將行兵即向前懸三將

軍長存執節帶劔把符敵之彼即大破也天

之三副將是下三元將軍李黃王三人是此

法中使用誅斬者上三元道不使人知

夫行道皆須知五星衛身神呪每日誦二遍

衛身光澤去邪入正但有疑即念之衛靈呪

夫立壇考召上唯救一人更治他人恐其鬼

惑亂謂之守一鬼神邪魔之道守一則却之

矣

太上曰直思道而行鬼自畏也

夫佩九州社今錄者經過神社皆自迎子拜

送勿以嗔言損子道也

趙侯字蒞自小學道為殺鬼多罰為考召典

三千年

凡秘呪每日誦之勿令人聞呪曰

上仙上靈衛我長生百鬼須遠萬神皆行輪

迴我身與道合成

夫制鬼神不得久禁若久禁皆須約限如大

罪只得禁伐如違非治身之道

夫人不信道欲來刑已以名書於六壬符以

深處投之其人自伏

心冷病即呵出熱即吹出肝病噓出肺病即

呵出脾病呼出腎病吹出

天一炁也雷一炁也日月一炁也夫受天炁正月一日五更二點之時記握固面向東直行上三步上三步者直行罡丁字三步是也耳仙人云步罡者雲行術又云直上也閉氣握手呪曰

乾元亨利貞六甲與吾并吾受天炁治身去毒內外俱成內除身百病外收攝百精安家救人萬毒藏形急急如律令呪訖依方而納氣謹按東九南三西七北五中央十二取之後五日亦可與人治吹毒瘡痛病况自身乎受雷公之炁以每歲初驚蟄之日雷動一聲

出握固向之呪曰

吾受雷公之炁雷母之威聲方除身中萬毒百姓同得治形今吾感使五行之將方法之兵斬斷百病吹出萬精急急如律令即鎮九氣入鼻十氣入口一口吞之後三日可吹萬病應口自消矣年年為之大驗年年初聞雷受之若臥中聞亦受之行聞坐聞各依其法皆得若急用但聞雷便受之亦得小小靈驗不如初雷年年受之三年之中治人病痛便

瘥蟲毒自除大驗不假文書方法之言吐即救人納即鎮身故曰吐納者也服氣三符在靈官安神訣中

夫求神仙長生之道一受符籙制立身神上生錄除死籍驅六甲制三官內治身外救人

二服符帶徽鎮惡安心堅脈實腑臟通仙靈使鬼護人三去尸破穢駐色鎮神四告陳章表度災去厄延命留神解囚誅符以取生壽五醮祭仙靈求通天地伏惡消凶解獄燒書以除死籍六呪術扶持經法共濟末運內安


身心外救人物此六者通仙人也

太上曰六通之子號曰仙人未即昇天也若在世千變萬化三官不害五斗共扶收鬼救人攝妖走邪行符破廟立作便成若秘之更修後入神仙若見神力自在不修自說天皇災變妄召是非術法廣傳百千集會講談如此者三官惡之必奏太上泄天之機失道而死五星芝有五一見四不見一見芝光也長視其季星春夏秋冬各主五星隨季看星光明

淨者精氣逸也以面向星閉口塞鼻放氣鳴齒二十四握固存其季星至鼻孔口便入鼻迴轉入口用元氣金漿送之九納東方少時即吐星光化作七星戴於頭上次橫斗或三斗二斗一斗四斗五斗咸是內事也經云吞一星戴五斗又橫斗坐斗以斗懸斗逆斗順斗有七種治身之上以伏眾邪百鬼千神萬靈下官故氣惡念皆消矣服此令人上通星漢知天地災殃變動之徵吉凶風水成敗之候星精報人也

若修行服六甲符不論年月日此是鎮身治藏長生之道若有病處依舍影圖取符書貼之此名外鎮鬼神不逾三日即瘥內亦合符萬病自除夫鎮常思七星戴履橫坐臥皆然鎮者懸於額戴者頭戴履者行四正步也橫斗者橫曾上坐斗如戴斗如人立行斗若有圖內用思星與外大約同也

禹步



右閉氣先行左足令三步九跡間架無長短

量壇大小爲之若大即作七星丁字步有數
丁步七即不成丁者不是若又不到角步畢
即常行而去但遠壇取匝皆論大醮小醮不
須以前結界設訖即左手執水右手執劍
於座西北角以劍攪水三匝又重呪曰

北斗七星之精入此水中百殮之鬼速遠萬
里不去斬死急急如律令便遠座噴灑水訖
又呪曰

斬邪將軍捕鬼使者驅除辟斥勿使鬼物精
邪輒干急急如律令

夜北向丁字罡

去三尸法

常以五月五日取桃葉五升熟搗之坐令氣
入下部九孔腹中從且至暮尸蟲出之即離
苦厄

都章畢印者都諸錄也言都者管也章者記
數之名畢者盡其事也以都諸官將吏兵印
署而行道之要義修行之叙保命安身是都
部制諸錄名
靈書肘後鈔

玄壇刊誤論

悟微子張若海集

筌七

悟微子世參簪褐業在焚修三洞齋科誠爲
已任因循而已踏駁有疑未遇通人無所質
正一日有霓襟雲帔者云自天台四明而來
容止粹和瞻視端肅不言姓氏稱雲光先生
誠方外逍遙之人也儒釋該通仍精三洞科
教由是捨策憩止獲與之遊且曰咸洛江湖
既聞隴蜀仙壇靈嶽皆得徧遊每見齋醮舊
儀不免倒置子之習誤能服義而改之子悟
微子曰小人顛愚欣聞良訓稽首作禮幸得
樞衣凡蒙指疵書諸紳帶其玄壇謬誤有二
十品目實前賢未曾商榷輒思流行奉三天
之法者目之曰玄壇刊誤論無或執迷而違
義也

論入靖品第一

雲光先生曰凡修齋三日前道士入齋堂靖
室潔雲襟神止息妄念不履穢穢不聽笙歌
端然一心唯在齋法而已今之道士預於齋
官者能孤潔無雜常自默朝造次昇壇固無

觸穢猶於教法須示規繩雖云道德內充亦
在威儀外備而苟非此輩寧免混淆豈可且
在塵埃暮登陞級俾其自省汝意安乎若官
觀之中不能三日或一日二日亦可也俗家
修設一晝夜入精其義且通悟微子稽首曰
敬聞命矣

重論入靖品第二

悟微子白先生曰入靖之事近多因循苟能
至誠豈在預事雲光先生曰此乃庸俗道士
欺謾庸俗之夫非通論也假如國家有事郊
廟其齋官太常卿上至太尉並散齋四日致
齋三日受戒誓後不吊喪問疾不作樂不判
刑殺文書不行刑罰不親穢事不入妻妾之
房祭前一夜都省鑾宿明日御史清道其所
往郊廟之路金吾司勒地界禁斷師僧孝子
喪車不許觸污齋官有瀆專神也況三清上
聖乎悟微子曰若在官宅即然若在宮觀道
士各居靖室豈俟齋時方更入靖得無自鄙
耶先生曰不然道士所居靖室是廢止之室
非入靖朝真之室今宮觀有精思堂凝神堂